

Jurulatih teladan pemain

Oleh Norrasyidah Arshad | 9 Disember 2017



MEHMET Durakovic (dua kiri) ketika Forum Perangsang Selangor Speaker Corner sempena Hari Bola Sepak Komuniti Selangor dan Karnival Bola Sepak. Turut sama Safirul Azli (kiri), legenda bola sepak Malaysia, Datuk Santokh Singh (dua kanan) dan Shazwan Wong (kanan) di Stadium Shah Alam.- Foto Muhammad Sulaiman

SHAH ALAM: Individu yang dipilih menjadi jurulatih bola sepak perlu menjadi teladan (role-model) kepada pemain.

Pengarah Urusan Little League Soccer, Shazwan Wong Abdullah, berkata itu adalah antara faktor utama dalam melahirkan pemain yang baik.

Selain menjadi teladan, jurulatih juga perlu menunjukkan disiplin yang tinggi selain membentuk komunikasi yang baik dengan pemain.

"Jurulatih bukan hanya perlu mengajar, kemudian pulang. Sekarang, konsep itu tidak boleh ada kerana jurulatih adalah teladan yang dipandang pemain.

"Jurulatih perlu mencari punca kelemahan pemain serta mempunyai jalan penyelesaian untuk mengatasi kelemahan itu. Jangan hanya tahu mencari kelemahan tanpa penyelesaian," katanya ketika menjadi panel dalam Forum **Perangsang Selangor** Speakers' Corner, di sini, hari ini.

Forum berkenaan turut dihadiri Raja Muda Selangor, Tengku Amir Shah.



Tiga panel lain dalam forum itu ialah lagenda bola sepak Malaysia, Datuk Santokh Singh; Jurulatih Perak FA, Mehmet Durakovic dan Ketua Pegawai Eksekutif Program Pembangunan Bolasepak Negara (NFDP), Safirul Azli Abu Bakar.

Shazwan yang berpengalaman menjadi jurulatih kelab di China, berkata berdasarkan pengalamannya, tidak semua pemain boleh dikritik.

Katanya, pemain dalam golongan itu, walaupun mampu bermain dengan baik tetapi apabila dikritik, mereka akan menjadi lemah sekali gus menyebabkan mereka prestasi merosot.

"Bukan semua dapat terima kritikan pedas. Ada yang boleh terima dan jadikan kritikan itu sebagai teguran untuk bangkit.

"Oleh itu, jurulatih perlu kenal peribadi pemain. Jurulatih juga perlu berkorban dari segi masa," katanya.

<https://www.bharian.com.my/sukan/bola/2017/12/361387/jurulatih-teladan-pemain>